

Mud Volapüka

Nüm 79

20 tobul 2017

Bukemaboed

Fövot lekoned-mära yutopik
„Ventürs hiela ‚Nenolikan‘ e flenas omik“
fa hiel „N. N. Nosov“

Prim kapita teldegzülid. Pö baol.

Ettimo musig eprimon ad tonön, e valikans ejutedons ad danüdön. Spidülan ädanüdom kobü Glügakrovülan bläga=heremik, Nolikan ädanüdom kobü Nifaflogülan, Murülan ädanüdom kobü Svalülan. E, kio=stunabiko!, sanan: Pilulülan< ädanüdom kobü Pulnomaran. Si, si! Pulnomaran koo ekömof ad baol. Plas elenükof mänedi vietik ofik, keli valikans kösömons ad logön pö of, älenlabof klotemi jönik labü figurs floras, e leno äsümedof Pulnomaran sevärik et, kel äguvof nämädiko pö malädanöp okik. Ätulof ön danüd, kipölo nami okik len jot Pilulülana, e smililölo äsagof ome:

„Ga dasevorös, das metod obsik lekäla binon leplu gudikumu ka orsik. Nedos ad besmivön blütis, vunis, junis ed igo bulädis valasotiks me miel. Miel binon medinu vemo gudik ta näfätamaläds e büo=ne=let=on purulami.“

„No kanob siön ori.“ - sanan: Pilulülan< ädodom. - „Nedos ad besmivön vunis, junis ä blütis valiks me yodina=tintur. Yodin koo binon medinu vemo gudik ta näfätamaläds e büoneleton purulami.“

„Ab ga dasevorös, das yodinatintur orik kodon hiti skine, sovüo lekäl me miel jenädon go nen dolam.“



„Kanob siön, das lekäl me miel binon-la pötöfiku te kol jicilils, ab miel leno vobedon hicililis.“

„Kikodo üfo?“ - Pulnomaran estunikof.

„Ga it esagor, dat lekäl me miel binon nendoliku.“

„Ab zesüdos-li kol ors, das dolam komon?“

„Zesüdos.“ - sanan: Pilulülan< egesagom. - „If hicilil lovexänom love kiud e junom lögi, täno nedos ad hitükön juni me yodinatintur, dat hicilil omemom, das binos riskodiku ad bexänön kiudi, e no ulovexänom love kiud nogna.“

„Ab votikna oxänom sui nuf pla kiud, udofalom ed udämükom kapi okik.“ - Pulnomaran esagof.

„Täno ubesmivobs kapi etana me yodinatintur, ed utan omemom, das koo binon riskodiku ad xämön su nuf. Yodinatintur labon siämi dugälik vemik.“

„Sanan muton tikön dö läsükam dola malädana pla siäm dugälik.“ - Pulnomaran egesagof. - „Ab te vemükumor dolami me yodinatintur orik.“

„Sanan muton betikön valikosi.“ - Pilulülan esagom. - „Vo, ven lekälöy jicililis, tän kanoy demön nosi, ab ven lekänöy hicililis...“

„Spikogsös dö votikos.“ - Pulnomaran vüspikof omi. - „No mögos ad danüdön kobü or.“

„Nö, abgüä no mögos ad danüdön kobü or!“

„No binor plütiku!“

„Si, no bitob plüto ven sagoy obe cedi so nennolik.“

„Güo notodor cedi nennolik! Binor no sananu ab lu=sananu miserabik.“

„Ab binor... binor!..“

Sanan: Pilulülan< äkanom sagön nosi demü le=nof.

Estopikom zänodü piadil danüdik e



konvuliko ämaifükom mudi äsvo fit pe=setiröl se vat. Telats danüdöl äkobjokons ta om. Pulnomaran pe=fi=joikof go vemo. Etirof omi len sliv:

„Ekö, danüdoröd! Kikodo estopikor? Neletogs valikanes ad danüdön!“

Pilulülan efänom nami siölo, e atans dönu eprimons ad danüdön. Primo ädanüdoms stiliko, pas täno dönu eprimons ad feitön dö methods lekäla.

Bastetülan ädanüdom kobü Tubilülan. Spikot go votik äjenädon pö ons.

„Daifets plitons-li ori? - Bastetülan äsäkom.

„Vemo.“ - Tubilülan ägesagof. - „Ab plidor-li onis?“

„Koo plidob onis. Ab bu val plidob toedis.“

„Ab plidob gladeti bu val.“

Skrübülan ädanüdom kobü Yatülan.

„Vilob fi=lärnön ad vabön pö tood.“ - Yatülan äsagof. - „Jicilils mödik bevü obs ifilärnofs, klu koo uplöpob.“

„Atos binon vemo fasiliku.“ - Skrubülan esiom. - „Büiküno nedos ad pedön tridömi gleipöl tuitaluibis xaba, pas tän bosilo pedön müfa=tridömi ...“

Nenolikan ädanüdom kobü Blövalogikan. Ye te pa=stetos, das Nenolikan ädanüdom. Veräto te Blövalogikan ädanüdog, ab Nenolikan äbunülom äsvo kapar, tridölo futis Blövalogikana e laido joikölo votikanis. Fino Blövalogikan esagof:

„Buikumo seidobsös obis.“

Eseidons sui bamil.

„Sevor-li, das leno fagob ad danüdön.“ -

Nenolikan esagom.

„Gudos, das it ekoefor atosi.“ -

Blövalogikan egesagof. - „Votikan pö stad orik vemo lugonöv-la, sagölo, das lögs e brads utana dolons, ab snatiko esagor, das no fagor. Daküpob, das digädor ad flenön kol or.“

„Si, mögos ad flenön kol ob.“ - Nenolikan esiom.



„Löfilob ad flenön kol hicilils.“ - Blövalogikan esagof. - „Jicilils no plitons obi demü utos, das tuvemo pölacedofs tefü jön oksik e mufedofs lo lok.

„Hicilils somik koo dabinons, kels löfiloms ad logedön okis pö lok.“ - Nenolikan egesagom.

„Ab no binor-li somiku, o Nenolikan? Vo-li, no binor somiku?“

„Nö, no binob somiku.“ - Nenolikan egesagom.

Ed elugom atosi. Jenöfo, ven nek älogom omi, suvo ämufedom lä lok ed äbetikom jöni okik. Reto, leigoäs hicilil alik votik.

„Vemo fredob, das no binor somiku.“ - Blövalogikan egesagof. -

„Oflenogs kol ods. Labob mobi vemo nitedik. Openogsös penedis lü ods. Primo upenorör penedi pro ob, pas tän upenob penedi pro or.“

„Liö!“ - Nenolikan etikom, kel äkanom penön te me penät penditik e vemo äjamom ad säklänedön nekulivi okik.

„Lü kis pened zesüdon?“ - espikülom däsperiko. - „Ga topätogs niliko de ods. Mögos ad kosädön somiko [mudöfo].“

„Ag, kio=naütiku binor, o Nenolikan! Vilor dunön nosi pro ob. Ga kio= nitediku binos ad nüsumön penedi!“

„Rajanö.“ - Nenolikan eyilidom. - „Ulaudob penedi.“

Eprimos ad dagön pos brefüp. Lampiuns tums anik elitikons valemiko. Uts ästralons e pö bims e pö buigs. Id uts anik pe=pladons ini yeb nilü bims, e dub atos äjinos, das yeb ito liton me lit seimik märrik. Donadil priela, sus kel musigalef ästodon, pä=tegon me körten jönik blövik. Süpo körten emaifikon e valikans eküpons skafi pödü on.

Jipoedan: ‚Vielaflo=ul=än‘ < epubof pö skaf ed ävokädof:

„Takedö! Seilö! Konsärt nu ojenon. Prüdö!“

Valikans eseidons okis sui bamis ed eblümikons ad lelilön.

„Prüdö!“ - Vielaflo=ulan älai=vokädof. - „Obitidob balido. Odeklamob poedoti obsik nulik dö flenam.“

Hicilils e jicilils äplodons laodiko. Töbo plod efinikon Lüran evinegom, esvönölo me dileka=staf okik, musigalef eprimon ad pläyön, e Vielaflo=ulan

eprimof ad deklamön ön musig poedoti okik nulik dö flenam. Poedot at äbinon gudiku leigoäs poedots valik, kelis Vielaflorülan älautof, ed äfinikon me vöds: ‚Obs valik mutobs flenikön, mutobs nämükön flenami!‘

Posä poedot, kel vemo äpliton valikanis, pe=fi=deklamon, danüda=lef äbitidon. Jicilils degtel lenlabü klotemi jönik vielik pe=deköl me tanods ädanüdots danüdis valasotik, bevü kels danüd nemü ‚Rap=ül‘ eklülädon binön gudikünu. Lülogans lunüpiko äplodons ed ävokädons: „brafö!“ < sovüo jüs ‚Rapül‘ pe=dönuon nog telna. Pos danüdalef kor hicililas di Kaitöp äbitidon. Kor ekaniton kanitis ömik.

Reidolsös fövoti konota pö nüm fovik.